

Transport vositalari egalarining fuqarolik javobgarligini majburiy sug'urta qilish bo'yicha E-polisni (elektron polisni) onlayn rasmiylashtirish shartlari yuzasidan

OMMAVIY OFERTA

Ushbu ommaviy oferta (keyingi o'rinlarda – oferta) “O'zbekinvest” EISK” AJ (keyingi o'rinlarda – sug'urtalovchi) bilan sug'urta qildiruvchi o'rtasida transport vositalari egalarining fuqarolik javobgarligini majburiy sug'urta qilish (keyingi o'rinlarda – TVEFJMSQ) bo'yicha E-polisni (elektron polisni) onlayn rasmiylashtirish (shartnoma tuzish, o'zgartirish kiritish va bekor qilish) tartiblari hamda sug'urtalash shartlarini belgilaydi.

Mazkur oferta O'zbekiston Respublikasining Fuqarolik kodeksi, “Elektron tijorat to'g'risida”gi, “Elektron hujjat aylanishi to'g'risida”gi, “Sug'urta faoliyati to'g'risida”gi Qonunlari, Vazirlar Mahkamasining 2020 yil 14 dekabrda 780-sonli “Transport vositalari egalarining fuqarolik javobgarligini majburiy sug'urta qilish bo'yicha E-polisni sotish, rasmiylashtirish va ularning haqiqiylikini tekshirish” qarori hamda O'zbekiston Respublikasi Vazirlar Mahkamasining 2008 yil 24 iyundagi 141-sonli qarori bilan tasdiqlangan “Transport vositalari egalarining fuqarolik javobgarligini majburiy sug'urta qilish” qoidalari asosida ishlab chiqilgan.

I. Umumiy shartlar va tushunchalar

1. Ushbu ofertada quyidagi tushunchalardan foydalaniladi:

E-polis – transport vositalari egalarining fuqarolik javobgarligini majburiy sug'urta qilish bo'yicha elektron shaklda tuzilgan sug'urta shartnomasi;

Sug'urta hodisasi – E-polisga ko'ra transport vositasidan foydalanishda jabrlanuvchining hayoti, sog'lig'i va (yoki) mol-mulkiga yetkazilgan, sug'urta qildiruvchining sug'urta tovonini amalga oshirishiga sabab bo'ladigan zarar bo'yicha javobgarligi sug'urta qilingan, sug'urta qildiruvchi yoki boshqa shaxsning fuqarolik javobgarligining yuzaga kelishi;

Sug'urta puli – sug'urtalovchi sug'urta hodisasi sodir bo'lganda yetkazilgan zararining o'rnini uning doirasida jabrlanuvchiga (uning merosxo'ri yoki huquqiy vorisiga) qoplash majburiyatini oladigan pul summasi;

Sug'urta mukofoti – sug'urta qildiruvchi E-polisni sotib olish uchun sug'urtalovchiga to'lashi shart bo'lgan pul mablag'lari summasi;

Sug'urta tovonini – sug'urtalovchi E-polisga muvofiq sug'urta hodisasi sodir bo'lganda jabrlanuvchiga uning hayoti, sog'lig'i va (yoki) mol-mulkiga yetkazilgan zararining o'rnini qoplash hisobiga sug'urta puli doirasida to'lashi shart bo'lgan pul mablag'lari summasi;

Yagona axborot tizimi – O'zbekiston Respublikasi Ichki ishlar vazirligi, Moliya vazirligi huzuridagi byudjetdan tashqari Pensiya jamg'armasi, boshqa manfaatdor vazirliklar va idoralarning axborot tizimlari hamda markaziy ma'lumotlar bazalari, jismoniy va yuridik shaxslar markaziy ma'lumotlar bazalari bilan integratsiyalashgan, majburiy sug'urta qilish bo'yicha onlayn tartibda faoliyat yurituvchi yagona axborot tizimi;

Transport vositasi egasining yaqin qarindoshlari – transport vositasi egasining transport vositasidan foydalanish va uni boshqarish uchun notarial tasdiqlanadigan ishonchnoma rasmiylashtirilishi talab qilinmaydigan yaqin qarindoshlari (ota-ona, er (xotin), bolalar, aka-ukalar, opa-singillar).

Rasmiy veb-sayt va mobil ilovadan foydalanish – sug'urta qildiruvchining undan foydalanishga qaratilgan har qanday harakati.

2. Ofertaning amal qilish hududi – O'zbekiston Respublikasi.

3. Xorijiy davlatlarda ro'yxatdan o'tkazilgan va O'zbekiston Respublikasida vaqtinchalik foydalanilayotgan transport vositalarining egalari mazkur oferta tarafi bo'lishi mumkin emas.

4. Rasmiy veb-sayt va mobil ilovadan foydalanishda dastavval sug'urta qildiruvchi ushbu oferta shartlari bilan to'liq tanishib chiqishi lozim. Agar sug'urta qildiruvchi oferta shartlariga yoki uning ayrim qismlariga rozi bo'lmasa, u rasmiy veb-sayt yoki mobil ilovadan foydalanishni to'xtatishi lozim. Sug'urta

qildiruvchining rasmiy veb-sayt yoki mobil ilovadan foydalanishni davom ettirishi ushbu oferta shartlariga to'liq va so'zsiz rozi ekanligini bildiradi.

II. E-polisni rasmiylashtirish

5. E-polisni rasmiylashtirish sug'urtalovchining rasmiy veb-saytining majburiy sug'urta uchun mo'ljallangan qismi yoki uning mobil ilovasi, telegram-bot va/yoki elektron to'lov tizimi orqali amalga oshiriladi.

6. E-polisni rasmiylashtirish uchun sug'urta qildiruvchi har bir transport vositasi bo'yicha E-polisni rasmiylashtirish to'g'risidagi elektron arizaga quyidagi ma'lumotlarni kiritadi:

- sug'urta qildiruvchining va/yoki transport vositasini boshqarishga vakolat berilgan jismoniy shaxslarning (transport vositasini boshqarishga faqat muayyan shaxslarga ruxsat berilishi sharti bilan E-polis rasmiylashtirilgan taqdirda) shaxsiy identifikatsiya raqami hamda shaxsini tasdiqlovchi hujjatning seriyasi va raqami;
- soliq to'lovchining identifikatsiya raqami (yuridik shaxs uchun);
- transport vositasi egasining shaxsiy identifikatsiya raqami va shaxsini tasdiqlovchi hujjatning seriyasi hamda raqami (agar transport vositasi mulkdori boshqa jismoniy shaxs bo'lsa);
- elektron pochta manzili (mavjud bo'lsa) va mobil telefon raqami;
- E-polis rasmiylashtirilayotgan transport vositasining davlat raqami belgisi hamda ro'yxatdan o'tkazilganligi to'g'risidagi guvohnomaning seriyasi va raqami;
- agar sug'urta qildiruvchi qonunchilikka asosan imtiyoz olish huquqiga ega bo'lgan shaxslar toifasiga kirsam, majburiy sug'urta bo'yicha imtiyozlar mavjudligi to'g'risida belgi qo'yilib, mazkur toifaga tegishlilikini tasdiqlovchi hujjatlarning (guvohnoma, ma'lumotnoma) tegishli raqamlari;
- transport vositasi egasining ixtiyori bilan mazkur transport vositasidan foydalanish va uni boshqarishga qo'yilgan yaqin qarindoshlarining (ota, ona, er (xotin), o'g'il, qiz, aka, uka, opa, singil) qarindoshlik darajasini tasdiqlovchi hujjatlarning tegishli raqamlari;
- transport vositasining ro'yxatdan o'tgan joyi;
- sug'urta muddati (1 yil, 6 oy yoki undan ortiq — transport vositasidan mavsumiy foydalanilganda; 10 kun yoki undan ortiq — ro'yxatdan o'tish joyiga qadar);
- E-polis rasmiylashtirilganligi to'g'risidagi xabarnomani yuborish shakli (telefon raqami, elektron pochta manzili yoki sug'urtalovchi veb-saytida (mobil ilovasi orqali) ochilgan shaxsiy kabinet orqali).

Bunda tegishli ma'lumotlar yagona axborot tizimida mavjud bo'lganda avtomatik tarzda to'ldiriladi.

7. Elektron ariza to'ldirilayotgan vaqtda Yagona axborot tizimi qisman yoki to'liq ishlamagan, ya'ni davlat axborot bazalari qisman ishlamagan va/yoki ular bilan aloqa uzilgan taqdirda, sug'urta qildiruvchi arizadagi qolgan ma'lumotlarni qo'lda kiritadi yoki hujjatlarni ilova qiladi.

8. Elektron ariza to'liq to'ldirilgandan so'ng sug'urta qildiruvchi tomonidan yuborish tugmasi bosiladi.

9. Sug'urtalovchining mas'ul xodimlari tomonidan yuborilgan elektron arizadagi ma'lumotlar bir ish kuni ichida to'liqligi va to'g'riligi tekshirilib, sug'urta qildiruvchiga sug'urta mukofotini to'lashi mumkinligi yoki ma'lumotlarni qayta to'g'rilashi to'g'risida xabarnoma yuboriladi. Agar sug'urta qildiruvchi tomonidan ariza berilgan sanadan boshlab 24 soat davomida ma'lumotlar qayta tekshirilmasa va/yoki to'g'rilanmasa, sug'urta tashkiloti E-polisni rasmiylashtirish, qayta rasmiylashtirish va bekor qilish imkoniyati yo'qligi to'g'risida sug'urtalovchining Internet jahon axborot tarmog'idagi resursi yoki SMS-xabar orqali sug'urta qildiruvchini xabardor qiladi.

10. Sug'urta qildiruvchi sug'urta mukofotini to'lashi mumkinligi to'g'risidagi xabarnomani olgandan so'ng 24 soat mobaynida sug'urta mukofotini elektron to'lov tizimlari orqali, naqd pulda yoki pul o'tkazish yo'li bilan (yuridik shaxslar) to'lashi lozim.

Sug'urta mukofoti E-polisda nazarda tutilgan to'lovdan kamroq miqdorda to'langan bo'lsa, sug'urta tashkiloti sug'urta mukofotining to'lanmagan qismi sug'urta qildiruvchi tomonidan 72 soat muddatda to'lanishi zarurligi to'g'risida darhol xabarnoma yuboradi.

11. Sug'urta mukofoti to'langanligi fakti ushbu oferta sug'urta qildiruvchi tomonidan aksept qilinganligini anglatadi.

12. E-polis sug'urta qildiruvchi tomonidan sug'urta mukofoti to'langan paytdan (izoh: boshqa muddat belgilanishi mumkin) boshlab kuchga kiradi. Agar E-polisda sug'urtaning amal qilishi boshlanishining boshqacha muddati nazarda tutilmagan bo'lsa, majburiy sug'urta elektron shartnomasi kuchga kirganidan keyin yuz bergan sug'urta hodisalariga nisbatan tatbiq etiladi.

13. Sugʻurta mukofoti toʻliq toʻlangandan keyin E-polis rasmiylashtirilganligi toʻgʻrisidagi xabarnoma sugʻurta qildiruvchi tomonidan tanlangan shaklda yuboriladi va u quyidagilarni oʻz ichiga oladi:

- sugʻurta tashkilotining nomi;
- transport vositasining rusumi va davlat raqami belgisi;
- sugʻurta mukofoti miqdori;
- E-polisning amal qilish muddati;
- E-polisning noyob raqami;
- Yagona axborot tizimiga havola.

14. Sugʻurta qildiruvchi Yagona axborot tizimiga havola orqali oʻtib, E-polisni yuklab olishi mumkin.

DIQQAT!

15. SUGʻURTA QILDIRUVCHI OʻZI TOMONIDAN ELEKTRON POLISNI RASMIYLASHTIRISH UCHUN USHBU OFERTANING 6-BANDIDA KELTIRILGAN SUGʻURTALOVCHIGA TAQDIM ETILAYOTGAN MAʼLUMOTLAR VA HUJJATLARNING HAQIQIYLIGI UCHUN JAVOBGAR HISOBLANADI.

III. Taraflarning huquq va majburiyatlari

16. Sugʻurta qildiruvchi quyidagi huquqlarga ega:

- sugʻurtalovchidan E-polis toʻgʻrisida tushuntirish berishni talab qilish;
- rasmiy veb-sayt va mobil ilovadan istalgan paytda foydalanishni toʻxtatish;
- majburiy sugʻurtani amalga oshiruvchi sugʻurtalovchini tanlash.

Sugʻurta qildiruvchi:

- belgilangan tartibda va muddatda E-polis boʻyicha oʻziga yuklatilgan majburiyatni bajarishi;
- E-polis boʻyicha sugʻurta mukofotini belgilangan shartlar asosida va tartibda toʻlashi shart.

17. Sugʻurtalovchi quyidagi huquqlarga ega:

- jabrlanuvchi (uning merosxoʻrlari yoki huquqiy vorislari)ning arizasini koʻrib chiqishda tegishli ekspertlarni jalb etish;
- sugʻurta qildiruvchi tomonidan taqdim etilgan axborotlarni tekshirish, sugʻurta shartnomasi talablari va shartlarining sugʻurta qildiruvchi tomonidan bajarilishini nazorat qilish;
- sugʻurta hodisalari yuzaga kelishining oldini olish boʻyicha tavsiyalar berish;
- qonunda belgilangan holatlarda toʻlangan sugʻurta tovonini regress tartibida toʻlab berilishini talab qilish.

Sugʻurtalovchi:

- sugʻurta qildiruvchiga internet-resursidan tunu kun toʻsiqlarsiz foydalana olish imkoniyatini yaratishi;
- sugʻurta qildiruvchining va (yoki) jabrlanuvchining sugʻurta toʻlovi va (yoki) tovonini toʻlab berishni soʻrab sugʻurtalovchiga qilgan murojaatini koʻrib chiqishi;
- oʻz faoliyatini amalga oshirish natijasida olingan sugʻurta qildiruvchi va jabrlanuvchi toʻgʻrisidagi maʼlumotlarning maxfiyligini taʼminlashi shart.

18. Rasmiy veb-sayt yoki ilovadan foydalanish imkoniyati faqatgina Internet jahon axborot tarmogʻiga kirish imkoni boʻlgandagina vujudga keladi. Shu sababli, sugʻurta qildiruvchi Internetga belgilangan tartibda ulanish choralarini mustaqil koʻrishi lozim.

19. Sugʻurtalovchi quyidagi zararlar uchun javobgar emas:

- sugʻurta qildiruvchi oldida rasmiy veb-sayt va mobil ilovadan foydalanish bilan bogʻliq zararlar uchun;
- rasmiy veb-sayt va mobil ilovadagi maʼlumotlar sugʻurta qildiruvchi tomonidan uchinchi shaxslarga berilishi oqibatlari uchun;
- sugʻurtalovchiga bogʻliq boʻlmagan sabablarga koʻra rasmiy veb-sayt va mobil ilovadan foydalana olmaganligi va xizmatlar koʻrsatilmaganligi uchun.

20. Jabrlanuvchi quyidagi huquqlarga ega:

- sugʻurta toʻlovi va (yoki) tovonini toʻlab berishni soʻrab sugʻurtalovchiga murojaat qilish;
- sugʻurtalovchining sugʻurta toʻlovi va (yoki) tovonini toʻlashni rad etish toʻgʻrisidagi qarori ustidan sudga shikoyat qilish;
- qonun hujjatlarida belgilangan shartlar asosida va tartibda sugʻurta toʻlovi va (yoki) tovonini olish.

IV. E-polisni o'zgartirish va muddatidan oldin tugatish

21. E-polis amal qiladigan davrda sug'urta qildiruvchi sug'urtalovchiga E-polisni rasmiylashtirish to'g'risidagi arizada ko'rsatilgan ma'lumotlardagi o'zgarishlar haqida zudlik bilan xabar qilishi shart. E-polisni rasmiylashtirishda taqdim etilgan ma'lumotlardagi o'zgarishlar to'g'risida axborot olinganda sug'urtalovchi E-polisga tegishli o'zgartirishlar kiritadi. Bunda sug'urtalovchi tegishli o'zgartirishlar kiritilgan E-polisni sug'urta qildiruvchiga belgilangan usulda yuboradi.

22. E-polisning amal qilishi muddatidan oldin tugatilgan taqdirda, sug'urta mukofotining bir qismi to'langan tovon summasiga va E-polis amal qilishining kunlar hisobidagi qolgan muddatiga mutanosib ravishda qaytariladi.

23. Sug'urta qildiruvchiga (uning qonuniy vakillariga, merosxo'rlariga, huquqiy vorislariga) sug'urta mukofotining bir qismini qaytarish sug'urta qildiruvchi (uning qonuniy vakillari, merosxo'rlari, huquqiy vorislari) tegishli tartibda murojaat qilgan kundan boshlab 14 kalendar kun mobaynida amalga oshiriladi. Bunda sug'urta qildiruvchiga qaytarilishi lozim bo'lgan sug'urta mukofotining bir qismi sug'urta qildiruvchining arizasiga muvofiq yangi rasmiylashtirilgan E-polis bo'yicha sug'urta mukofoti hisobiga o'tkazilishi mumkin.

V. Sug'urta hodisasi sodir bo'lganda shaxslarning harakatlari

24. Jabrlanuvchilarga zarar yetkazilishiga olib kelgan yo'l-transport hodisasi (YTH) ishtirokchisi bo'lgan sug'urta qildiruvchi (fuqarolik javobgarligi E-polisga muvofiq sug'urtalangan boshqa shaxs) jabrlanuvchi(lar)ning talabiga ko'ra unga TVEFJMSQ bo'yicha E-polisi to'g'risida ma'lumot berishi zarur.

25. Sug'urta qildiruvchi sug'urta hodisasi sodir bo'lganda quyidagilarni amalga oshirishi zarur:

- jabrlanuvchiga YTH kundan boshlab uch kalendar kundan kechiktirmay sug'urta polisining nusxasini topshirishi;
- darhol, YTHdan keyin 72 soatdan kechiktirmay, sodir bo'lgan hodisa haqida sug'urta polisining nusxasini ilova qilgan holda sug'urtalovchiga murojaat qilishi;
- sug'urtalovchini sug'urta hodisasi munosabati bilan unga nisbatan qo'yilayotgan barcha talablar haqida xabardor qilishi.

VI. Sug'urta to'lovi va (yoki) tovonini to'lash

26. Sug'urta to'lovi va (yoki) tovonini to'lash tartibi O'zbekiston Respublikasi Vazirlar Mahkamasining 2008 yil 24 iyundagi 141-sonli qarori bilan tasdiqlangan "Transport vositalari egalari fuqarolik javobgarligini majburiy sug'urta qilish" qoidalariga asosan amalga oshiriladi.

E-polis bo'yicha jabrlanuvchi yoki sug'urta qildiruvchining xohishiga binoan (sug'urta hodisasini to'g'ridan-to'g'ri hal etish holatlarida) sug'urta hodisasi ro'y berganligi to'g'risida bildirishnoma yuborish, yetkazilgan zarar miqdorini aniqlash hamda sug'urta to'lovlarini amalga oshirish uchun Vazirlar Mahkamasining 2008 yil 24 iyundagi 141-sonli qarori bilan tasdiqlangan Transport vositalari egalari fuqarolik javobgarligini majburiy sug'urta qilish qoidalarida belgilangan hujjatlarning elektron yoki skanerlangan nusxalarini sug'urtalovchining Internet jahon axborot tarmog'idagi resursida jabrlanuvchi yoki sug'urta qildiruvchi (sug'urta hodisasini to'g'ridan-to'g'ri hal etish holatlarida) sug'urta tashkilotiga yuborishga haqli.

27. Agar sug'urta hodisasi ro'y berganligini va sug'urta qildiruvchi tomonidan yetkazilgan zarar miqdorini tasdiqlovchi hujjatlar yetarli bo'lmasa, sug'urtalovchi bu haqda ushbu hujjatlar olingan kundan boshlab uch ish kuni ichida, yetishmayotgan va (yoki) noto'g'ri rasmiylashtirilgan hujjatlarning to'liq ro'yxatini ko'rsatgan holda jabrlanuvchi yoki sug'urta qildiruvchining (sug'urta hodisasini to'g'ridan-to'g'ri hal etish holatlarida) elektron pochta manziliga (mavjud bo'lsa) va (yoki) ko'rsatilgan telefon raqamiga SMS-xabar orqali ma'lumot yuborishi kerak.

28. Taqdim etilgan hujjatlarning to'liq ro'yxati va qabul qilingan sanasi to'g'risida elektron ma'lumotnoma ariza beruvchiga u ko'rsatgan elektron pochta manziliga (agar mavjud bo'lsa) yuboriladi va (yoki) sug'urtalovchining Internet jahon axborot tarmog'idagi resursida ariza beruvchining shaxsiy kabinetida ko'rsatiladi.

VII. Sug'urta summasi, sug'urta mukofoti, sug'urta to'lovi va (yoki) tovon miqdori

29. TVEFJMSQ bo'yicha sug'urta summasi 80 000 000 (sakson million) so'mni tashkil etadi. Shundan:

- jabrlanuvchining mol-mulkiga zarar yetkazilganda sug'urta to'lovi sug'urta summasining 35 foizini tashkil etib, 28 000 000 (yigirma sakkiz million) so'm;
 - jabrlanuvchining hayoti yoki sog'lig'iga zarar yetkazilganda sug'urta tovonining miqdori sug'urta pulining 65 foizini tashkil etib, 52 000 000 (ellik ikki million) so'm.
30. Sug'urta qildiruvchi tomonidan TVEFJMSQ bo'yicha to'lanadigan sug'urta mukofoti miqdori ushbu ommaviy ofertaning 1-ilovasida ko'rsatilgan.
31. Sug'urta qildiruvchi tomonidan to'lanishi lozim bo'lgan sug'urta mukofotining miqdori E-polisni rasmiylashtirish to'g'risidagi elektron arizaga kiritilgan ma'lumotlarga muvofiq, shuningdek imtiyoz (chegirma) huquqi hisobga olingan holda aniqlanadi.

VIII. Shaxsga doir ma'lumotlarni qayta ishlash shartlari

32. Sug'urta qildiruvchi E-polisni rasmiylashtirish to'g'risidagi elektron arizaga ma'lumotlarni kiritishi bilan E-polisni amalga oshirish uchun o'zining shaxsiga doir ma'lumotlarini qayta ishlashga (yig'ish, yozish, tizimlash, saqlash, foydalanish va bekor qilish) rozilik bergan deb hisoblanadi.
33. Shaxsga doir ma'lumotlarni qayta ishlash sug'urtalovchi tomonidan sug'urta shartnomasi bo'yicha majburiyatlarini amalga oshirish maqsadida "Shaxsga doir ma'lumotlar to'g'risida"gi 2019 yil 2 iyuldagi O'zbekiston Respublikasining Qonuniga muvofiq amalga oshiriladi.

IX. Yakunlovchi qoidalar

34. Ushbu ofertaning talablarini buzganlikda aybdor bo'lgan shaxslar qonun hujjatlarida belgilangan tartibda javob beradilar.
35. Ushbu ofertada nazarda tutilgan yoki u bilan bog'liq masalalar bo'yicha taraflar o'rtasida kelishmovchiliklar yuzaga kelganda, taraflar kelishmovchilikni sudgacha hal etish choralarini ko'rishlari lozim.
36. Nizoni sudgacha hal etish imkoniyati bo'lmasa, ular sug'urtalovchi joylashgan yerdagi tegishli sudda O'zbekiston Respublikasining qonunchilik hujjatlariga asosan hal etiladi.
37. Ushbu ofertada nazarda tutilmagan holatlar bo'yicha vujudga kelgan nizolar qonun hujjatlarida belgilangan tartibda hal etiladi.

№1 - Ilova
TVEFJMSQ bo'yicha to'lanadigan
sug'urta mukofoti

	Sug'urta muddati	CHEKLANGAN												CHEKLANMAGAN		
		12 oy				6 oy				20 kun				12 oy	6 oy	20 kun
		0	1 martta	2 martta	3 martta	0	1 martta	2 martta	3 martta	0	1 martta	2 martta	3 martta	-	-	-
Toshkent shahar va Toshkent viloyati	1 yilda YTH soni	0	1 martta	2 martta	3 martta	0	1 martta	2 martta	3 martta	0	1 martta	2 martta	3 martta	-	-	-
	Yengil avtomobillar	192 000	249 600	384 000	576 000	134 400	174 720	268 800	403 200	38 400	49 920	76 800	115 200	384 000	268 800	76 800
	Yuk avtomobillar	336 000	436 800	672 000	1 008 000	235 200	305 760	470 400	705 600	67 200	87 360	134 400	201 600	672 000	470 400	134 400
	Avtobus va mikroavtobuslar	384 000	499 200	768 000	1 152 000	268 800	349 440	537 600	806 400	76 800	99 840	153 600	230 400	768 000	537 600	153 600
	Tramvaylar, mototsikllar va motorollerlar, traktorlar, o'ziyurar yo'l-qurilish mashinalari va boshqa mashinalar	72 000	93 600	144 000	216 000	50 400	65 520	100 800	151 200	14 400	18 720	28 800	43 200	144 000	100 800	28 800

	Sug'urta muddati	CHEKLANGAN												CHEKLANMAGAN		
		12 oy				6 oy				20 kun				12 oy	6 oy	20 kun
		0	1 martta	2 martta	3 martta	0	1 martta	2 martta	3 martta	0	1 martta	2 martta	3 martta	-	-	-
Boshqa viloyatlar	1 yilda YTH soni	0	1 martta	2 martta	3 martta	0	1 martta	2 martta	3 martta	0	1 martta	2 martta	3 martta	-	-	-
	Yengil avtomobillar	160 000	208 000	320 000	480 000	112 000	145 600	224 000	336 000	32 000	41 600	64 000	96 000	320 000	224 000	64 000
	Yuk avtomobillar	280 000	364 000	560 000	840 000	196 000	254 800	392 000	588 000	56 000	72 800	112 000	168 000	560 000	392 000	112 000
	Avtobus va mikroavtobuslar	320 000	416 000	640 000	960 000	224 000	291 200	448 000	672 000	64 000	83 200	128 000	192 000	640 000	448 000	128 000
	Tramvaylar, mototsikllar va motorollerlar, traktorlar, o'ziyurar yo'l-qurilish mashinalari va boshqa mashinalar	60 000	78 000	120 000	180 000	42 000	54 600	84 000	126 000	12 000	15 600	24 000	36 000	120 000	84 000	24 000

	Sug'urta muddati	CHEKLANGAN												CHEKLANMAGAN		
		12 oy				6 oy				20 kun				12 oy	6 oy	20 kun
		0	1 martta	2 martta	3 martta	0	1 martta	2 martta	3 martta	0	1 martta	2 martta	3 martta	-	-	-
Xorijiy davlatlarda ro'yxatdan o'tkazilgan transport vositalari	1 yilda YTH soni	0	1 martta	2 martta	3 martta	0	1 martta	2 martta	3 martta	0	1 martta	2 martta	3 martta	-	-	-
	Yengil avtomobillar	320 000	416 000	640 000	960 000	128 000	166 400	256 000	384 000	64 000	83 200	128 000	192 000	640 000	256 000	128 000
	Yuk avtomobillar	560 000	728 000	1 120 000	1 680 000	224 000	291 200	448 000	672 000	112 000	145 600	224 000	336 000	1 120 000	448 000	224 000
	Avtobus va mikroavtobuslar	640 000	832 000	1 280 000	1 920 000	256 000	332 800	512 000	768 000	128 000	166 400	256 000	384 000	1 280 000	512 000	256 000
	Tramvaylar, mototsikllar va motorollerlar, traktorlar, o'ziyurar yo'l-qurilish mashinalari va boshqa mashinalar	120 000	156 000	240 000	360 000	48 000	62 400	96 000	144 000	24 000	31 200	48 000	72 000	240 000	96 000	48 000